

COMENTARIO

LAGO NA VENTA

Poco poco, Aruba ta trata di recupera di e ciere di Lago, cu a significa un golpe serio pa nos comunidad. Verdad ta, cu ciere di Lago tabata tin un impacto ariba henter comunidad, pero especialmente ariba esnan cu na un forma directo o indirecto, tabata depende di e compania pa nan entrada. Lago a cera, Lago a bay. Esaki ta e hecho cu nos mester biba cune. A surgi un situacion cu ta realmente un reto, comoquiera cu e ta invita nos pa demostra cu realmente nos kier traha duro pa alcanza un objetiva cu pa años nos a fija. Pero pa nos por yega caminda nos kier yega, nos mester mira dilanti, no bay sigui bira cara wak atras.

E constante informenan encunto posible venta y interes pa compra di Lago, ta stroba nos sigui mira dilanti, pa e simple hecho cu nos como ser humano, lo bay fija atencion ariba un posibilidad, cu realmente ta remoto. Cada vez cu nos tende cu tin gruponan interesa den compra di Lago, nos ta bay carga un speranza, cu tin poco chance di wordo cumpli. Cargando speranza den un posibilidad, nos atencion ta wordo kita for di e pasonan cu ta necesario pa nos alcanza nos objetiva, cu ta un Aruba cu un economia realmente sano, esta bon balancea: un lugar caminda nos tur poniendo man na obra, por biba bon, segun nos sistema, a base di nos criterionan, nos identidad, cu nos principianan. Un Aruba, libre estatalmente y ariba tur otro terreno. Nos por alcanza e meta aki, pero nos no por wordo desvia pa ningun posibilidad remoto y ningun speranza, cu por resulta falso.

Nos mester biba cu e realidad, cu ciere di Lago no ta un caso isola ariba su mes, pero ta un parti di un cadena internacional. Tur caminda na mundo tin problema cu refinarianan; tur caminda na mundo, loke a wordo yama oro negro, ta representa problema actualmente. Lago no ta un caso unico, y no ta solamente Lago ta na venta, pero un cantidad di otro refinarianan na diferente lugar na mundo. Loke ta haci Lago atractivo ta e hecho cu e posibilidad ta existi cu Aruba por bira talbez un pais productor di petroleo. E posibilidad cu tin azeta den nos subsuelo, e posibilidad di presencia di rikeza natural, ta haci Lago atractivo den wowo di esnan cu lo kier hinca placa den Lago.

Nos mester biba cu e realidad, tene vista fija ariba realidad pa nos por comprende realidad. Si no, nos ta gaña nos mes y nos ta crea speranza falso cu lo bay afecta nos. Aruba y no Lago tin interes di companianan petrolero, pa e simple motibo cu tin posibilidad cu den futuro un compania o mas por haya permiso pa explora y eventualmente bora petroleo na Aruba. Y venta di Lago ta un di e pasonan cu por asegura cu un compania lo por tin entrada, esta preferencia den e proceso pa yega na exploracion y explotacion di rikeza natural.

Lago ta propiedad di un compania multinacional, esta internaciona. Ora nos papia di Lago nos mester usa midi internacional pa midi. Nos mester tene cuenta cu Lago no ta di nos, y cu nos no por vende Lago. Loke si ta di nos, ta loke tin den nos suelo y ta haci nos atractivo pa e companianan internacional, cu no ta preocupa cu awe, pero si cu e posibilidatnan di mañan.

Lago a cera. Esey ta un seguridad. Lago nos trate como e unico seguridad cu nos tin enfrente Lago. Y laga nos traha ariba e diversificacion di nos economia. Si trahando ariba un base nobo, por haya un comprador pa Lago y Exxon bay di acuerdo, nos lo tin un motibo mas pa ta contento.

Por lo pronto, laga nos considera venta di Lago pa loke e ta: un posibilidad remoto, cu no por wordo mira los di e interes pa por explora y explota eventualmente loke suelo di Aruba tin di ofrece.

Segun Charro Kelly

DIPUTADONAN A HAYA AUMENTO DI ENTRADA

ORANJESTAD(AAN)—Segun e Eilandsverordening di 7 di September 1984, e compensacion di diputadonan a keda stipula na fls.7.106, -- pa luna.

Copia di e decreto a keda entrega pa Charro Kelly na number di Accion Democrático Nacional.

Un que otro tin que haber cu e proximo cambio di e compensacion, y

segun Kelly a constata, awor cu e sueldo di e ambtenaarnan a baha cu un average di 7 3/4 por ciento y pa e ambtenaarnan alto cu 8 por ciento y mey, segun e decreto menciona e sueldo di e diputadonan mester a baha automaticamente y wordo stipula na fls.6.506,-- pa luna.

Charro Kelly ta bisa sinembargo, cu awor Bestuurscollege tin e curashi

pa manda parlamento un proposicion pa aumenta e sueldonan di e diputadonan te na f.6.781 pa luna, loke ta encera un aumento di 275 florin pa luna y ta igual na un aumento di 4.2 por ciento.

E gobierno aki falta tur clase di seriedad, segun Charro Kelly, cu a bisa cu e copia di e decreto ta pa ilustra un que otro.

E ta termina puntrando con esaki por ta posible den e tempo aki.

AVP TA BINI CU MOCION ARIABA POSIBEL CAMBIO DI FECHA DI INDEPENDENCIA

ORANJESTAD(AAN)—Segun Mr. Henny Eman lider di AVP ayera durante conferencia di AVP cu AVP ta keda insisti cu e fecha di independencia ta algo incorrecto, inhuisto y no ta na su lugar pa Hulandesnan impone ariba pueblo Arubano.

El a laga sa cu AVP ta convenci cu tin tur caminda habri ainda pa bringe den futuro ariba momento cu mayoria di pueblo Arubano mester para tras di un cambio di e fecha ey si resulta cu ta necesario.

AVP ta di opinion cu e cambio di Statuut cu Aruba ta bira un pais ariba su mes, ta resultado di un lucha di 50 año y cu AVP lo sostiene e cambio cu mester wordo aproba ainda den Staten y den Eilandsraad.

Probablemente AVP lo bini cu un mocion den Staten y Eilandsraad, caminda AVP kier reserva derecho di pueblo pa pa medio di un referendum cambia e fecha di 1996.

Esaki mester wordo acepta den Staten pa tur partido politico di Anti-

llas Hulandes, pasobra el a ser acepta caba den pasado, entre otro den e protocol Mito, y sr. Eman ta kere cu henter parlamento Arubano

tinbe mester muestra Hulanda cu aki caminda cu si e tin voto y influencia directo, e proyecto di ley ta wordo sosteni pero acompaña pa un mocion unanimamente acepta cu ta reserva derecho di pue-

blo Arubano pa dicidi si e mester cambia e fecha of sea posponi of kizas hale dilanti, den futuro.

POSICION DI EXXON TA FUERTE AINDA NA ARUBA

ORANJESTAD(AAN)—Diputado v.d. Kuyp a duna di conoce cu oficialmente gobierno di Aruba no a tende di Venezuela bao di cual condicion nan lo ta dispuesto pa suministra Aruba cu crudo.

El a muestra ariba e problema cu tin y esey ta cu henter e infraestructura pa por suministra e productonan petrolero pa pueblo di Aruba, te awe ta den man di Exxon. Ta Exxon ta doño te awe di e refineria na unda tin tur e facilidatnan.

Si acaso Aruba mes ta pensa di tuma e refineria

over pa su mes, esaki ta significa cu toch mester sinta na mesa cu Exxon pa por tuma over e infraestructura, y equiponan cu nan tin pa por suministra e productonan aki pa pueblo di Aruba.

Pesey, segun diputado v.d. Kuyp a cera e contacto cu Esso Petrolera y no cu otro compania.

A pidi Shell tambe si nan ta interesa pa suministra productonan petrolero pa Aruba, y nan a laga sa cu nan no ta interesa. Esaki ta logico pasobra Shell e ora ey mester bay sinta na mesa y

negocia pa cumpra henter e infraestructura di Exxon pasobra ta Exxon tin e na Aruba.

Esey ta duna Exxon un posicion bastante fuerte ariba e punto aki, a ser splica.

Cualquier plan cu gobierno por tin ta plan ariba termino largo y no ariba termino corto.

Gobierno di Aruba a pone Exxon na altura cu Gobierno tin intencion di traha su mes infraestructura pa suministracion di productonan petrolero pa Aruba, pero esaki lo bay costa 8 millon dollar mas o menos.